

Ekoran terlalu kerap bangkitkan isu peralihan kuasa

# PM khuatir timbul ketidaktentuan

FUKUOKA 8 OGOS

ISU peralihan kepemimpinan yang terlalu kerap ditimbulkan dikhuatiri akan menimbulkan rasa ketidaktentuan dalam negara, kata Perdana Menteri, Tun Dr Mahathir Mohamad.

Dr. Mahathir menegaskan, beliau sudah berkali-kali menyatakan proses peralihan akan tetap berlaku.

“Jadi kalau kita terlangsung sangat cerita pasal pertukaran, ramai orang akan merasa *feelings of uncertainty* (rasa ketidaktentuan). Kalau tukar, apa jadi?” katanya pada wartawan Malaysia pada akhir lawatan kerjanya ke Fukuoka selama dua hari pada Khamis.

Terbaharu, tiga pertubuhan bukan kerajaan (NGO) menggesa Dr. Mahathir menyerahkan jawatan Perdana Menteri kepada Presiden PKR, Datuk Seri Anwar Ibrahim selewat-lewatnya pada 9 Mei 2021, genap tiga tahun Pakatan Harapan (PH) menjadi



**DR. MAHATHIR MOHAMAD beramah mesra dengan kalangan profesional dari syarikat-syarikat berpangkalan di Kyushu selepas menyampaikan syarahan di Institut Kepimpinan Kyushu-Asia (KAIL) di Fukuoka, Jepun, semalam. - BERNAMA**

kerajaan Pusat.

Tiga NGO tersebut ialah Gabungan Pilihan Raya Bersih dan Adil

(Bersih 2.0), Angkatan Belia Islam Malaysia (ABIM) dan Gabungan Bertindak Malaysia (GBM).

Dr. Mahathir berkata, ketika beliau berundur sebelum ini dengan harapan penggantinya

akan meneruskan dasar-dasar yang memberi kejayaan kepada negara namun apa yang berlaku mereka telah menukar dasar-dasar berkenaan.

“Sekarang bila dengar nak tukar, dia pun khuatirlah. Takut nanti semua tukar dasar,” katanya.

Dr. Mahathir berkata, beliau tidak percaya penggantinya kelak akan menukar semua dasar.

“Mungkin ada sedikit sebanyak perubahan, pendekatan, tapi pada umumnya saya fikir tak ada cara lain untuk mentadbir Malaysia daripada cara yang telah kita amalkan sekian lama, yang telah memberikan kejayaan kepada kita,” katanya.

Ditanya sama ada Anwar ada menyatakan kemungkinan mengenai perubahan dasar dalam pertemuan-pertemuan sebelum ini, Dr. Mahathir berkata, Anwar menyatakan sokongan kepada beliau.

“Saya tak pikir dia (Anwar) akan ubah (dasar). Tak patut ada *sense of uncertainty*,” katanya. **-BERNAMA**